



Broj: 02-19-1463/21-AP-6
Datum: 12.11.2021. godine

Na osnovu člana 8. stav (3) alineja 31) i 37) Zakona o principima lokalne samouprave („Službene novine Federacije BiH“, broj: 49/06 i 51/09), člana 12. Zakonom o javnom redu i miru („Službene novine ZDK“, broj: 08/00, 15/03, 11/07 i 8/08), u vezi sa Zakonom o zaštiti i dobrobiti životinja („Službeni glasnik BiH“, broj: 25/09) i člana 25. Statuta općine Zavidovići („Službene glasnik Općine Zavidovići, broj: 5/2008, 5a/2008 i 11/2019), Općinsko vijeće Zavidovići, na svojoj __. sjednici održanoj dana __. __. 2021. godine, donijelo

ODLUKU

o uslovima i načinu držanja kućnih ljubimaca, načinu postupanja s napuštenim i izgubljenim životinjama na području općine Zavidovići

DIO PRVI - OPĆE ODREDBE

Član 1. (Predmet Odluke)

Ovom Odlukom se uređuju minimalni uslovi i način držanja kućnih ljubimaca, pasa i domaćih mački, registracija, uslovi kretanja koje im njihovi imaoци moraju osigurati, način kontrole njihovog razmnožavanja te način postupanja s napuštenim i izgubljenim životinjama na području općine Zavidovići.

Član 2. (Pojmovi)

Pojedini pojmovi u ovoj Odluci imaju sljedeće značenje:

- a) kućni ljubimci su: psi, domaće mačke, domaće ptice, mali glodari, terarijske, akvarijske i druge životinje koje se uzgajaju i drže za društvo, rekreaciju, zaštitu ili pomoć čovjeku;
- b) izgubljena životinja je životinja koja je odlutala od vlasnika i on je traži;
- c) napuštena životinja je životinja koju je vlasnik svjesno napustio ili zbog više sile kao što je bolest, smrt ili gubitak slobode;
- d) opasne životinje su one vrste životinja od koje postoji ili ne postoji rizik da prema svojim prirodnim / urođenim sklonostima ispoljava sklonost za napad na čovjeka koji mu može nanijeti tjelesne povrede ili ga usmrтити;
- e) opasan pas je bilo koja jedinka te vrste, porijeklom od bilo koje pasmine koja je ničim izazvana napala čovjeka i nanijela mu tjelesne povrede ili ga usmrтила, ničim izazvana napala drugog psa i nanijela mu teške tjelesne povrede, uzgajana ili dresirana za borbe

- pasa ili zatečena u organiziranoj borbi sa drugim psom, pas pasmine terijera tipa bull koji ne potječe iz kontroliranog uzgoja;
- f) imalac životinje odnosno kućnog ljubimca (u daljnjem tekstu: imalac) je svaka pravna ili fizička osoba koja je vlasnik, odgovorno ili zaduženo lice za životinju dužno da se brine o njenom zdravlju i dobrobiti životinje;
 - g) pas lualica je svaki pas koji nema vlasnika, koji nije pod kontrolom vlasnika ili ga vlasnik ne sprečava u lutanju, što uključuje napuštene i izgubljene pse;
 - h) radne životinje su psi koji služe kao tjelesni čuvari i čuvari imovine, psi vodiči slijepih i oni koji služe za pomoć, psi tragači i psi koji služe za obavljanje drugih poslova;
 - i) sklonište za životinje (u daljnjem tekstu: sklonište) je objekt u kojem se smještaju i zbrinjavaju napuštene i izgubljene životinje gdje im se osigurava potrebna pomoć;
 - j) službene životinje su životinje koje imaju licencu za rad i služe za obavljanje poslova pojedinih državnih tijela;
 - k) Veterinarske organizacije u skladu sa Zakonom o veterinarstvu Federacije BiH (Službene novine Federacije BiH broj 46/00) su: veterinarske stanice, veterinarske klinike, apoteke kao i samostalna veterinarska praksa;
 - l) Javne površine su: pješačke saobraćajnice i trotoari, javne zelene površine (parkovi, travnjaci, zelenilo uz saobraćajnice) i sportsko-rekreativne površine (izletišta, šetališta i sl.).

DIO DRUGI - USLOVI I NAČIN DRŽANJA KUĆNIH LJUBIMACA

Član 3.

(Dužnosti i zabrane za imaoce kućnih ljubimaca)

- (1) Imalac kućnih ljubimaca dužan je kućnog ljubimca:
 - a) držati u skladu s njihovim potrebama, a u skladu sa uslovima predviđenim Zakonom o zaštiti i dobrobiti životinja, Pravilnikom o držanju opasnih životinja i ovom Odlukom;
 - b) smjestiti u dovoljno prostora i osigurati im odgovarajuće uslove kretanja, ako su vezani i zatvoreni, koji odgovaraju njihovoj veličini i zaštiti od vremenskih neprilika i drugih nepovoljnih uticaja za njihov život;
 - c) redovno i pravilno hraniti te trajno omogućiti pristup svježoj pitkoj vodi;
 - d) označiti psa mikročipom i vakcinisati protiv bjesnila u skladu sa Zakonom o veterinarstvu F BiH;
 - e) onemogućiti bijeg i kretanje po javnim površinama bez nadzora;
 - f) na vidljivom mjestu, na ulazu u prostor ili objekat u kojem se nalazi opasan pas staviti oznaku koja sadrži oznaku „OPASAN PAS“, te imati ispravno zvono na ulaznim dvorišnim ili vrtnim vratima;
 - g) pravovremeno zatražiti veterinarsku pomoć te osigurati zbrinjavanje i odgovarajuću njegu bolesnih i ozlijeđenih životinja;
 - h) održavati čistim prostor u kojem borave.

(2) Imaocu kućnih ljubimaca zabranjeno je:

- a) zanemarivanje kućnih ljubimaca u smislu njihovog zdravlja, smještaja, ishrane i njege;
- b) ograničavanje kretanje kućnih ljubimaca koje mu uzrokuju bol, patnju, ozljede ili strah;
- c) bacanje petardi ili drugih pirotehničkih sredstava na životinje;
- d) trčanje kućnih ljubimaca privezanih uz motorno prijevozno sredstvo u pokretu;
- e) držati pse trajno vezane ili ih trajno držati u prostorima ili dijelu dvorišta bez omogućavanja slobodnog kretanja izvan tog prostora;
- f) vezati pse, osim privremeno u iznimnim situacijama kada ograđivanje dijela dvorišta nije izvodivo u tom slučaju pas se može vezati na način da mu je omogućeno kretanje u promjeru 5 (pet) metara, a sredstvo vezanja i ogrlica moraju biti od takvog materijala da psu ne nanese bol ili ozljede;
- g) držanje kućnih ljubimaca na adresi različitoj od prebivališta ili boravišta imaoca, osim u slučaju kada se radi o radnim psima koji čuvaju neki objekt ili imovinu, a imalac im je dužan osigurati svakodnevni nadzor;
- h) držati kao kućne ljubimce opasne i potencijalno opasne životinjske vrste bez odobrenja nadležne institucije;
- i) postupati u suprotnosti sa zabranama iz člana 4. Zakona o zaštiti dobrobiti životinja („Službeni glasnik BiH“, broj: 25/09), životinju bez opravdanog razloga ubiti, nanositi joj bol, patnju i štetu, mučiti je i namjerno je izlagati stresu i strahu.

DIO TREĆI - USLOVI DRŽANJA KUĆNIH LJUBIMACA U STAMBENIM ZGRADAMA I PORODIČNIM KUĆAMA

Član 4.

(Držanje pasa i mački u stanu, porodičnoj kući, vrtu)

- (1) U objektima i zgradama kolektivnog stanovanja u stanu dozvoljeno je držati jednog psa i dvije mačke.
- (2) U porodičnoj kući, vrtu ili sličnom zemljištu dozvoljeno je držati dva psa, a najviše tri ukoliko se radi o autohtonoj vrsti psa i tri mačke.

Član 5.

(Održavanje čistoće)

Imalac kućnih ljubimaca dužan je brinuti o čistoći zajedničkih prostorija u kojima se kreću kućni ljubimci, te odmah očistiti, oprati i dezinficirati površinu, ukoliko je njegov ljubimac na bilo koji način onečistio (hodnici, stepeništa, terase, liftovi, balkoni, podrumski i tavanski prostor).

Član 6.

(Obezbjedivanje nadzora kućnog ljubimca)

- (1) U objektima i zgradama kolektivnog stanovanja, zabranjeno je držanje pasa i mačaka i ostavljanje istih bez nadzora imaoca na balkonu, terasi i liftu koja pripada stanu. U slučaju odsutnosti, imalac je dužan osigurati nadzor i brigu punoljetne osobe za svog kućnog ljubimca u skladu sa njegovim potrebama.
- (2) Imalac koji psa drži u stanu ili kući bez okućnice, dužan ga je svakodnevno izvoditi radi obavljanja nužde i zadovoljavanja dnevnih fizičkih aktivnosti.

Član 7.

(Kretanje u liftu, stubištu hodnika)

- (1) Uvođenje psa ili mačke u lift stambene zgrade, dozvoljeno je samo ako je lift prazan.
- (2) Prilikom korištenja lifta, stepeništa i hodnika stambene zgrade, pas mora biti na povodcu pod neposrednom kontrolom imaoca psa.
- (3) Psi visoke i srednje pasmine moraju biti sa brnjicom.

Član 8.

(Remećenje javnog mira i reda)

Imalac psa koji učestalim i dugotrajnim lajanjem, zavijanjem ili grebanjem remeti mir dužan je odmah preduzeti odgovarajuće mjere kako bi spriječio daljnje uznemiravanje ili ukloniti psa, u skladu sa odredbama Zakona o prekršajima protiv javnog reda i mira, a koji se odnosi na stav o proizvođenju neadekvatne buke.

Član 9.

(Saglasnost suvlasnika)

- (1) Držanje pasa i mačaka i drugih kućnih ljubimaca u zgradama kolektivnog stanovanja dozvoljeno je uz pismenu saglasnost svih etažnih vlasnika.
- (2) Psi se mogu držati u dvorištu porodične kuće, zajedničkom dvorištu porodične kuće u dvorištu sa većim brojem porodičnih kuća u posebnom objektu, po predhodno pribavljenoj suglasnosti svih suvlasnika porodične kuće, odnosno saglasnost svih vlasnika porodičnih kuća.
- (3) Ukoliko se pas drži u ograđenom prostoru ili u kućici za pse, smještaj kućice ili ograđenog prostora treba biti takav da ne ugrožava/ometa stanovanje u susjednom dvorištu.
- (4) Objekat za držanje psa iz predhodnog stava ovog člana, mora biti udaljen namanje 5 (pet) metara od najbliže stambene zgrade ili poslovnog objekta na susjednoj parceli, odnosno da ne ugrožava / ometa stanovanje u susjednom dvorištu.

Član 10.

(Držanje psa u ograđenom i neograđenom dvorištu)

- (1) Pas koji se drži u ograđenom dvorištu ili drugom zemljištu ne mora biti vezan ukoliko ograda svojom visinom i čvrstoćom osigurava sigurnost prolaznika i susjeda.
- (2) Ulazna kapija dvorišta individualnog stambenog objekta u kome se drži pas, mora biti vidno označena tablom sa crtežom i natpisom koji ukazuje na prisustvo psa / opasnog psa

- i mora imati ispravno zvono na ulaznim vratima.
- (3) Pas koji se drži u neograđenom dvorištu, mora biti sigurno vezan, na način da ne ometa kretanje i sigurnost građana i mora biti smješten u boks koji će osigurati da se pas neće moći samostalno udaljiti.

Član 11.

(Nemogućnost daljnje brige o kućnom ljubimcu)

- (1) Imalac kućnog ljubimca, koji se o njemu ne može više brinuti u skladu sa obavezama iz člana 3. ove Odluke, dužan je pronaći udomitelja; udruženje ili osobu koja će o njemu brinuti na propisan način ili ga predati u sklonište za životinje, koga u skladu sa Zakonom osnuje fizička ili pravna osoba, te je dužan snositi troškove boravka do udomljenja ili drugog načina zbrinjavanja životinje.
- (2) Udomitelj može biti punoljetno lice, kao dokaz mora priložiti ličnu kartu i potpisanu izjavu kojom preuzima obaveze prema životinji.
- (3) Udomljivati se mogu životinje prema propisanim kriterijima i uz prethodno provedene mjere nadležne veterinarske organizacije.
- (4) Zabranjuje se eutanazija zdravih životinja.

DIO ČETVRTI - USLOVI IZVOĐENJA KUĆNIH LJUBIMACA NA JAVNE POVRŠINE

Član 12.

(Izvođenje na javnu površinu)

- (1) Psi se smiju izvoditi na javne površine iz člana 2. tačka k) ove Odluke, na povodcu i pod nadzorom imaoa.
- (2) Imalac kućnog ljubimca dužan je tokom njegovog izvođenja na javnu površinu sa sobom imati propisanu službenu ispravu kao dokaz o njegovoj registraciji i vakcinaciji.

Član 13.

(Ograničenje kretanja po javnim površinama)

- (1) Kućnim ljubimcima zabranjeno je kretanje na dječijim igralištima, parkovima, cvjetnjacima, neograđenim sportskim terenima, dvorištima škola i vrtića te u drugim mjestima gdje postoji opasnost ugrožavanja zdravstveno-higijenske sigurnosti i zdravlja ljudi bez dopuštenja vlasnika i dozvole korisnika prostora.
- (2) Upravitelj javnih površina i ustanova dužni su istaknuti znak zabrane pristupa kućnim ljubimcima.

Član 14.

(Zabrana samostalnog kretanja po javnim površinama)

Iz razloga sigurnosti saobraćaja, građana i drugih životinja te u svrhu prevencije nekontroliranog razmnožavanja, zabranjeno je puštanje kućnih ljubimaca da samostalno hodaju javnim površinama bez prisutnosti i nadzora imaoa.

Član 15.
(Obaveze čišćenja javne površine)

Pri izvođenju kućnog ljubimca na javnu površinu imalac je dužan nositi pribor za čišćenje i očistiti javnu površinu koju će njegov kućni ljubimac onečisti.

Član 16.
(Kućni ljubimci u sredstvima javnog prevoza)

Kućni ljubimci se mogu uvoditi u sredstvo javnog prevoza samo pod utvrđenim pravilima prevoznika.

Član 17.
(Izuzeci od ove Odluke)

Ograničenje kretanja kućnih ljubimaca iz ove Odluke ne primjenjuje se na pse osposobljene za pomoć osobama s invaliditetom.

Član 18.
(Registracija)

- (1) Registracija u smislu ovog člana, podrazumijeva obavezno označavanje mikročipom, upis u propisane evidencije, registar, izdavanje službene isprave o upisu, identifikaciji i registraciji pasa, vlasništvu te obaveznim mjerama zaštite zdravlja u skladu sa posebnim propisima.
- (2) Troškove upisa obaveznog označavanja i izdavanja službenih isprava snosi vlasnik.

Član 19.
(Obavezna registracija)

- (1) Imalac kućnog ljubimca je dužan registrirati životinju u roku od 7 (sedam) dana od dana prvog sticanja vlasništva u veterinarskoj organizaciji koja vodi registar životinja.
- (2) Imalac kućnog ljubimca je dužan u roku od 7 (sedam) dana prijaviti otuđenje, uginuće u cilju utvrđivanja nestanka i smrti kućnog ljubimca, kao i svaku drugu promjenu o statusu životinje, rođenje (leglo), nadležnoj veterinarskoj organizaciji koja vodi Registar kućnih ljubimaca.
- (3) Kućni ljubimci koji ne mijenjaju vlasnika obavezno se identifikuju nakon navršena tri mjeseca starosti, a najkasnije prilikom prvog cijepljenja protiv bjesnila.
- (4) Registraciju cijepljenja vrši nadležna veterinarska organizacija.
- (5) Imalac psa je dužan označiti psa markicom koju je dobio prilikom registracije.
- (6) Imalac psa je dužan nadležnoj veterinarskoj organizaciji koja vodi upisnik (registar) pasa prijaviti uginuće psa radi utvrđivanja uzroka uginuća i ažuriranja baze podataka o registraciji životinja.

DIO PETI - POSTUPANJE SA OPASNIM PSIMA

Član 20.
(Dužnost imaoaca opasnog psa)

Imalac opasnog psa je dužan:

- a) Provesti sve zaštitne mjere koje su propisane odredbom člana 5. Pravilnika o držanju opasnih životinja („Službeni glasnik BiH“, broj: 27/10).
- b) Na ulazu u prostor u kojem se nalazi opasan pas mora biti vidljivo istaknuto upozorenje: >>OPASAN PAS>>.

Član 21.
(Postupanje sa opasnim psima)

Izvođenje opasnih pasa na javne površine dopušteno je isključivo sa brnjicom i na povodcu od strane imaoaca.

Član 22.
(Ovlaštenje komunalnog inspektora i komunalnog redara)

- (1) Pri sumnji da se radi o opasnom psu, komunalni redar i komunalni inspektor je ovlašten zatražiti na uvid od imaoaca potvrdu kojom se potvrđuje da su nad psom provedene sve propisane mjere.
- (2) Ukoliko imalac ne pokaže potrebnu dokumentaciju, komunalni redar i komunalni inspektor sastavlja službeni zapisnik, preduzima propisane mjere iz svoje nadležnosti te obavještava nadležnu veterinarsku inspekciju za daljnje postupanje iz nadležnosti veterinarske inspekcije.

DIO ŠESTI - NAČIN KONTROLE RAZMNOŽAVANJA KUĆNIH LJUBIMACA

Član 23.
(Kontrola razmnožavanja)

Imalac je dužan držati pod kontrolom razmnožavanje kućnih ljubimaca i spriječiti svako neplanirano razmnožavanje.

Član 24.
(Načini provođenja kontrole razmnožavanja)

- (1) Kontrola razmnožavanja pasa i mačaka provodi se trajnom sterilizacijom, kontrolom kretanja u vrijeme tjeranja ženki i upotrebom veterinarskih sredstava.
- (2) Ove poslove obavlja stručno lice iz nadležne veterinarske organizacije.

DIO SEDMI - NAČIN POSTUPANJA S IZGUBLJENIM I NAPUŠTENIM ŽIVOTINJAMA

Član 25.

(Postupanje s izgubljenim životinjama)

- (1) Imalac kućnog ljubimca dužan je u roku od 3 (tri) dana od dana gubitka prijaviti njegov nestanak skloništu za životinje, a u roku od 7 (sedam) dana veterinarskoj stanici koja je ovlaštena za vođenje Evidencije registrovanih kućnih ljubimaca.
- (2) Ako u roku od 14 (četnaest) dana od dana objave podataka imalac nije dostavio zahtjev za vraćanje životinje, sklonište postaje vlasnik životinje te je može udomiti.
- (3) Imalac izgubljene životinje dužan je nadoknaditi sve troškove kao i svaku štetu koju počini životinja od trenutka nestanka do trenutka vraćanja imaocu.

Član 26.

(Nalazak napuštene ili izgubljene životinje)

- (1) Nalazač napuštene ili izgubljene životinje mora u roku od 3 (tri) dana od nalaska životinje obavijestiti sklonište za napuštene životinje, ukoliko životinju nije vratio imaocu.
- (2) Nalazač napuštene ili izgubljene životinje mora pružiti životinji odgovarajuću zaštitu do vraćanja imaocu ili do smještaja u sklonište za napuštene životinje.
- (3) Životinja se ne smješta u sklonište ako se može utvrditi njen vlasnik, osim ako vlasnik odmah ne može doći po životinju.

DIO OSMI - NADZOR

Član 27.

(Nadzor nad provođenjem Odluke)

- (1) Nadzor nad provođenjem odredbi ove Odluke vrše nadležni organi, svako iz svoga djelokruga rada; komunalni redar i komunalni inspektor općine Zavidovići, u saradnji sa komunalnim inspektorom Zeničko-dobojskog kantona, veterinarska inspekcija Zeničko-dobojskog kantona, kao i pripadnici MUP-a Zeničko-dobojskog kantona, Policijska uprava Zavidovići, (ovlaštena lica).
- (2) Ovlaštena lica iz stava 1. ovog člana postupaju po službenoj dužnosti kada uoče postupanje protivno Odluci, te prema prijavi fizičkih ili pravnih osoba.
- (3) Komunalni redar i komunalni inspektor općine Zavidovići u saradnji sa nadležnim kantonalnim inspektorima vrše nadzor nad provođenjem odredbi članova 3., 4., 5., 6., 7., 9., 10., 12., 13., 14., 15., 20., 22. i 27. ove Odluke.
- (4) Veterinarski inspektor Zeničko-dobojskog kantona će vršiti nadzor nad provođenjem odredbi članova 3., 11., 18., 19., 20., 22., 23., 24., 26. i 27. ove Odluke.
- (5) Ako se u vršenju inspeksijskog nadzora onemogućiti nadležnom inspektoru obavljanje pregleda pružanjem fizičkog otpora ili ako se takav otpor osnovano očekuje, inspektor može tražiti pomoć / asistenciju nadležnog organa policije.
- (6) Pripadnici MUP-a Zeničko-dobojskog kantona, Policijska Uprava Zavidovići, u skladu sa svojim ovlaštenjima i nadležnostima propisanim Zakonom o javnom redu i miru

(„Službene novine Zeničko-dobojskog kantona“, broj: 8/2000 i 11/2007), vrši nadzor nad provođenjem odredbi članova 6., 8., 20., 21. i 22. ove Odluke.

Član 28.

(Prava i obaveze ovlaštenih lica)

Prilikom vršenja nadzora nad poštivanjem odredbi ove Odluke, ovlaštena lica imaju slijedeća prava i obaveze:

- a) da naredbe izvršenje obaveza utvrđenih ovom Odlukom i preduzimanju preventivne, korektivne i represivne mjere i radnje izdavanjem usmenih ili pisanih naređenja ili upozorenja na licu mjesta ili naknadno po saznanju za počinjenu nepravilnost ili prekršaj,
- b) da donose rješenja u pisanoj formi radi otklanjanja nepravilnosti u skladu sa Zakonom o organizaciji organa uprave u Federaciji BiH i Zakonom o upravnom postupku,
- c) na licu mjesta izreknu novčanu kaznu prekršajnim nalogom,
- d) podnesu zahtijev za pokretanje prekršajnog postupka,
- e) podnesu krivičnu prijavu, ukoliko je određeno postupanje predviđeno kao krivično djelo posebnim zakonom.

DIO DEVETI - NOVČANE KAZNE

Član 29.

(Novčane kazne)

(1) Novčanom kaznom od 150,00 - 1.000,00 KM kaznit će se imalac kućnih ljubimaca - fizičko lice i novčanom kaznom 200,00 - 1.500,00 KM kaznit će se imalac kućnih ljubimaca - pravno lice, ako postupi suprotno članu 19. i 20. ove Odluke:

- a) ne registruje životinju u roku od 7 (sedam) dana od dana prvog sticanja vlasništva u veterinarskoj organizaciji koja vodi registar životinja,
- b) u roku od 7 (sedam) dana ne prijavi otuđenje, uginuće u cilju utvrđivanja nestanka ili smri kućnog ljubimca, kao i svaku drugu promjenu o statusu životinje, rođenje (leglo), nadležnoj veterinarskoj organizaciji koja vodi registar kućnih ljubimaca,
- c) kućnog ljubimca koji ne mijenjaju vlasnike ne identifikuju nakon navršena tri mjeseca starosti, a najkasnije prilikom prvog cijepljenja protiv bjesnila,
- d) ne označi psa markicom koju je dobio prilikom registracije,
- e) ne prijavi nadležnoj veterinarskoj organizaciji koja vodi upisnik (registar) pasa uginuće psa radi utvrđivanja uzroka uginuća i ažuriranje baze podataka o registraciji životinja,
- f) imalac opasnog psa ne provede propisane zaštitne mjere,
- g) opasnog psa ne drži u zatvorenom prostoru,
- h) na ulazu u prostor u kojem se nalazi opasan pas nije istaknuto upozorenje „OPASAN PAS“.

- (2) Za prekršaj iz stava (1) ovog člana kaznit će se novčanom kaznom u iznosu od 200,00 – 1.500,00 KM odgovorno lice u pravnom licu.
- (3) Novčanom kaznom od 150,00 – 500,00 KM kaznit će se imalac kućnih ljubimaca, ako:
- a) ne ispunjava dužnosti i obaveze prema kućnom ljubimcu iz (člana 3.) ove Odluke,
 - b) ako drži veći broj pasa i mačaka od propisanog u stambenim zgradama, porodičnim kućama (član 4.) ove Odluke,
 - c) ne brine o čistoći zajedničkih prostorija u kojima se kreću kućni ljubimci i ne očisti odmah površinu koju je njegov ljubimac onečistio (član 5.) ove Odluke,
 - d) ne obezbijedi nadzor nad kućnim ljubimcem na balkonu, stepeništu, terasi i liftu u slučaju odsutnosti imaoca (član 6.) ove Odluke,
 - e) ne izvodi svakodnevno psa kojeg drži u stanu ili kući bez okućnice radi obavljanja nužde i zadovoljenja dnevnih fizičkih aktivnosti (član 6.) ove Odluke,
 - f) uvodi psa i mačku u lift koji nije prazan (član 7.) ove Odluke,
 - g) pri korištenju lifta, stepeništa i hodnika stambene zgrade pas nije na povodcu (član 7.) ove Odluke,
 - h) pas visoke i srednje pasmine nema brnjicu (član 7.) ove Odluke,
 - i) nije poduzeo mjere za sprečavanje remećenje javnog reda i mira (član 8.) ove Odluke,
 - j) drži psa bez saglasnosti suvlasnika (član 9.) ove Odluke,
 - k) drži psa u ograđenom i neograđenom prostoru (član 10.) ove Odluke,
 - l) ne ispunjava obaveze u slučaju da se više ne može brinuti o kućnom ljubimcu (član 11.) ove Odluke,
 - m) izvodi opasnog psa na javnu površinu bez brnjice i povodca (član 21.) ove Odluke,
 - n) ne pokaže komunalnom redaru potrebnu dokumentaciju (član 22.) ove Odluke,
 - o) ne drži pod kontrolom razmnožavanje kućnih ljubimaca (član 23.) ove Odluke,
 - p) ne postupa sa izgubljenom životinjom na način propisan članom 25. ove Odluke,
 - q) nalazač napuštene i izgubljene životinje postupi suprotno odredbi člana 26. ove Odluke,
 - r) ne uskladi način držanja kućnih ljubimaca sa odredbama člana 30. ove Odluke,
 - s) ne postupi po rješenju inspektora i drugih ovlaštenih lica.
- (4) Novčanom kaznom od 100,00 - 500,00 KM kaznit će se imalac kućnih ljubimaca ako pri izvođenju kućnih ljubimca na javne površine postupa suprotno odredbama člana: 12., 13., 14. i 15. ove Odluke.

DIO DESETI - PRIJELAZNE I ZAVRŠNE ODREBE

Član 30.
(Upoznavanje sa Odlukom)

Svi imaoi kućnih ljubimaca na području Općine Zavidovići bit će upoznati sa odredbama ove Odluke putem web-stranice Općine Zavidovići, putem mjesnih zajednica (oglasnih tabli, članova Savjeta i Sekretara mjesnih zajednica) i putem predstavnika etažnih vlasnika u zgradama kolektivnog stanovanja.

Imaoi kućnih ljubimaca, dužni su njihovo držanje uskladiti sa odredbama ove Odluke u roku od šest mjeseci od dana stupanja na snagu ove Odluke.

Član 31.
(Odredbe Odluke o komunalnom redu koje prestaje da važe)

Stupanjem na snagu ove Odluke prestaju da važe odredbe članova 174., 175., 176. i 178. Odluke o komunalnom redu („Službeni glasnik Općine Zavidovići“, broj: 3/2015 i 1/2017).

Član 32.
(Stupanje na snagu)

Ova Odluka stupa na snagu osmog dana od dana objavljivanja u „Službenom glasniku Općine Zavidovići“.

**PREDSJEDAVAJUĆA
OĆINSKOG VIJEĆA**

mr. iur. Erna Merdić Smailhodžić

O B R A Z L O Ž E N J E

PRAVNI OSNOV DONOŠENJA ODLUKE

U članu 8. stav (3) alineja 31) i 37) Zakona o principima lokalne samouprave u Federaciji Bosne i Hercegovine („Službene novine FBiH“, broj: 49/06 i 51/09) određeno je da: „U vlastite nadležnosti jedinice lokalne samouprave posebno spadaju:

- preduzimanje mjera osiguranja higijene i zdravlja,
- zaštita životinja“.

U članu 12. Zakona o javnom redu i miru („Službene novine ZDK“, broj: 08/00, 15/03, 11/07 i 8/08) propisano je da: „Općinsko vijeće može svojom odlukom propisati i druge prekršaje protiv javnog reda i mira“.

RAZLOZI DONOŠENJA ODLUKE

Zakonom o principima lokalne samouprave u Federaciji Bosne i Hercegovine („Službene novine FBiH“, broj: 49/06 i 51/09) određeno je između ostalog da u nadležnost jedinica lokalne samouprave posebno spada i preduzimanje mjera osiguranja higijene i zdravlja kao i zaštita životinja.

Kako je na području općine Zavidovići evidentan veliki broj napuštenih i izgubljenih pasa kao i držanja kućnih ljubimaca u zgradama kolektivnog stanovanja i u porodičnim kućama u užem urbanom području grada to se predlaže donošenje ove Odluke.

POJAŠNJENJE PRAVNIH RJEŠENJA

Članom 1. definisan je predmet Odluke.

Članom 2. definisano je značenje pojedinih pojmova ove Odluke.

Članom 3. propisane su dužnosti i zabrane imaoca kućnih ljubimaca.

Članovima 4., 5., 6., 7., 8., 9., 10. i 11. propisani su uslovi držanje kućnih ljubimaca u zgradama kolektivnog stanovanja, porodičnim kućama i vrtovima.

Članovima 12., 13., 14., 15., 16. i 17. uslovi izvođenja kućnih ljubimaca na javne površine.

Članovima 18. i 19. propisan je pojam registracije kućnih ljubimaca i obaveza registracije kućnih ljubimaca.

Članovima 20. i 21. propisani su dužnosti imaoca opasnog psa i postupanje sa opasnim psom.

Članom 22. propisana su ovlaštenja komunalnog inspektora i komunalnog redara ukoliko postoji sumnja da se radi o opasnom psu.

Članovima 23. i 24. propisan je način kontrole razmnožavanja kućnih ljubimaca.

Članom 25. propisana je obaveza imaoca kućnog ljubimca u slučaju kad se kućni ljubimac izgubi.

Članom 26. propisana je obaveza i način postupanja građana koji pronađu izgubljenju životinju.

Članom 27. propisani su nadležni organi za vršenje nadzora nad provođenjem ove Odluke.

Članom 28. propisana su prava i obaveze ovlaštenih lica za vršenje nadzora nad provođenjem ove Odluke.

Članom 29. propisane su sankcije za fizička i pravna lica ukoliko postupe suprotno odredbama ove Odluke.

Članom 30. propisan je način upoznavanja javnosti sa sadržajem i usvajanjem ove Odluke.

Članom 31. propisano je koje odredbe Odluke o komunalnom redu prestaju da važe stupanjem na snagu ove Odluke

Članom 32. propisano je stupanje na snagu ove Odluke

ODREDBE NACRTA KOJE SE MIJENJAJU

Član 1. (Predmet Odluke)

Ovom Odlukom se uređuju minimalni uslovi i način držanja kućnih ljubimaca, registracija, uslovi kretanja koje im njihovi imaoци moraju osigurati, način kontrole njihovog razmnožavanja te način postupanja s napuštenim i izgubljenim životinjama na području općine Zavidovići.

Član 2. (Pojmovi)

Pojedini pojmovi u ovoj Odluci imaju sljedeće značenje:

- a) kućni ljubimci su: psi, domaće mačke, domaće ptice, mali glodari, terarijske, akvarijske i druge životinje koje se uzgajaju i drže za društvo, rekreaciju, zaštitu ili pomoć čovjeku;
- b) izgubljena životinja je životinja koja je odlutala od vlasnika i on je traži;
- c) napuštena životinja je životinja koju je vlasnik svjesno napustio ili zbog više sile kao što je bolest, smrt ili gubitak slobode;
- d) opasne životinje su životinje koje pokazuju napadačko ponašanje prema čovjeku i mogu ugroziti zdravlje i sigurnost ljudi i životinja;
- e) imalac životinje odnosno kućnog ljubimca (u daljnjem tekstu: imalac) je svaka pravna ili fizička osoba koja je vlasnik, odgovorno ili zaduženo lice za životinju dužno da se brine o njemom zdravlju i dobrobiti životinje;
- f) pas lotalica je svaki pas koji nema vlasnika, koji nije pod kontrolom vlasnika ili ga vlasnik ne sprečava u lutanju, što uključuje napuštene i izgubljene pse;
- g) radne životinje su psi koji služe kao tjelesni čuvari i čuvari imovine, psi vodiči slijepih i oni koji služe za pomoć, psi tragači i psi koji služe za obavljanje drugih poslova;
- h) sklonište za životinje (u daljnjem tekstu: sklonište) je objekt u kojem se smještaju i zbrinjavaju napuštene i izgubljene životinje gdje im se osigurava potrebna pomoć;
- i) službene životinje su životinje koje imaju licencu za rad i služe za obavljanje poslova pojedinih državnih tijela,
- j) Veterinarske organizacije u skladu sa Zakonom o veterinarstvu Federacije BiH („Službene novine Federacije BiH“, broj: 46/00) su: veterinarske stanice, veterinarske klinike, apoteke kao i samostalna veterinarska praksa;
- k) Javne površine su: pješačke saobraćajnice i trotoari, javne zelene površine (parkovi, travnjaci, zelenilo uz saobraćajnice) i sportsko-rekreativne površine (izletišta, šetališta i sl.).

Član 3.
(Dužnosti i zabrane za imaoce kućnih ljubimaca)

- (3) Imalac kućnih ljubimaca dužan je kućnog ljubimca:
- i) držati u skladu s njihovim potrebama, a minimalno predviđenim Zakonom o zaštiti i dobrobiti životinja i ovom Odlukom;
 - j) smjestiti u dovoljno prostora i osigurati im odgovarajuće uslove kretanja, ako su vezani i zatvoreni, koji odgovaraju njihovoj veličini i zaštiti od vremenskih neprilika i drugih nepovoljnih uticaja za njihov život;
 - k) redovno i pravilno hraniti te trajno omogućiti pristup svježoj pitkoj vodi;
 - l) označiti psa mikročipom i vakcinisati protiv bjesnila u skladu sa Zakonom o veterinarstvu F BiH;
 - m) onemogućiti bijeg i kretanje po javnim površinama bez nadzora;
 - n) na vidljivom mjestu staviti oznaku koja upozorava na pse, te imati ispravno zvono na ulaznim dvorišnim ili vrtnim vratima;
 - o) pravovremeno zatražiti veterinarsku pomoć te osigurati zbrinjavanje i odgovarajuću njegu bolesnih i ozlijeđenih životinja;
 - p) održavati čistim prostor u kojem borave.

Član 9.
(Saglasnost suvlasnika)

- (5) Držanje pasa i mačaka i drugih kućnih ljubimaca u zgradama kolektivnog stanovanja dozvoljeno je uz saglasnost svih etažnih vlasnika.
- (6) Psi se mogu držati u dvorištu porodične kuće, zajedničkom dvorištu porodične kuće u dvorištu sa većim brojem porodičnih kuća u posebnom objektu, po prethodno pribavljenoj suglasnosti svih suvlasnika porodične kuće, odnosno saglasnosti svih vlasnika porodičnih kuća.
- (7) Ukoliko se pas drži u ograđenom prostoru ili u kućici za pse, smještaj kućice ili ograđenog prostora treba biti takav da ne ugrožava / ometa stanovanje u susjednom dvorištu.
- (8) Objekat za držanje psa iz prethodnog stava ovog člana, mora biti udaljen namanje 5 (pet) metara od najbliže stambene zgrade ili poslovnog objekta na susjednoj parceli, odnosno da ne ugrožava / ometa stanovanje u susjednom dvorištu.

Član 20.
(Dužnost imaoaca opasnog psa)

Imalac opasnog psa je dužan:

- a) Provesti sve zaštitne mjere koje su propisane, psa držati u zatvorenom prostoru iz kojeg ne može pobjeći, a vrata u prostoru u kojem se nalazi takav pas moraju biti zaključana,
- b) Na ulazu u prostor u kojem se nalazi opasan pas mora biti vidljivo istaknuto upozorenje: >>OPASAN PAS>>.

Član 29.
(Novčane kazne)

- (1) Novčanom kaznom od 30,00 - 1.000,00 KM kaznit će se imalac kućnih ljubimaca - fizičko lice; 200,00 – 1.500,00 KM kaznit će se imalac – pravno lice ako postupi suprotno članu 19. i 20. ove Odluke;
- a) ne registruje životinju u roku od 7 (sedam) dana od dana prvog sticanja vlasništva u veterinarskoj organizaciji koja vodi registar životinja,
 - b) u roku od 7 (sedam) dana ne prijavi otuđenje, uginuće u cilju utvrđivanja nestanka ili smri kućnog ljubimca, kao i svaku drugu promjenu o statusu životinje, rođenje (leglo), nadležnoj veterinarskoj organizaciji koja vodi registar kućnih ljubimaca,
 - c) kućnog ljubimca koji ne mijenjaju vlasnike ne identifikuju nakon navršena tri mjeseca starosti, a najkasnije prilikom prvog cijepjenja protiv bjesnila,
 - d) ne označi psa markicom koju je dobio prilikom registracije,
 - e) ne prijavi nadležnoj veterinarskoj organizaciji koja vodi upisnik (registar) pasa, uginuće psa radi utvrđivanja uzroka uginuća i ažuriranje baze podataka o registraciji životinja,
 - f) imalac opasnog psa ne provede propisane zaštitne mjere,
 - g) opasnog psa ne drži u zatvorenom prostoru,
 - h) na ulazu u prostor u kojem se nalazi opasan pas nije istaknuto upozorenje >>OPASAN PAS<<.

Novčanom kaznom od 30,00 - 500,00 KM kaznit će se imalac kućnih ljubimaca, ako:

- a) ne ispunjava dužnosti i obaveze prema kućnom ljubimcu iz (člana 3.) ove Odluke,
- b) ako drži veći broj pasa i mačaka od propisanog u stambenim zgradama, porodičnim kućama (član 4.) ove Odluke,
- c) ne brine o čistoći zajedničkih prostorija u kojima se kreću kućni ljubimci i ne očisti odmah površinu koju je njegov ljubimac onečistio (član 5.) ove Odluke,
- d) ne obezbijedi nadzor nad kućnim ljubimcem na balkonu, stepeništu, terasi i liftu u slučaju odsutnosti imaoca (član 6.) ove Odluke,
- e) ne izvodi svakodnevno psa kojeg drži u stanu ili kući bez okućnice radi obavljanja nužde i zadovoljenja dnevnih fizičkih aktivnosti (član 6.) ove Odluke,
- f) uvodi psa i mačku u lift koji nije prazan (član 7.) ove Odluke,
- g) pri korištenju lifta, stepeništa i hodnika stambene zgrade pas nije na povodcu (član 7.) ove Odluke,
- h) pas visoke i srednje pasmine nema brnjicu (član 7) ove Odluke,
- i) nije poduzeo mjere za sprečavanje remećenje javnog reda i mira (član 8.) ove Odluke,
- j) drži psa bez saglasnosti suvlasnika (član 9.) ove Odluke,
- k) drži psa u ograđenom i neograđenom prostoru (član 10.) ove Odluke

- l) ne ispunjava obaveze u slučaju da se više ne može brinuti o kućnom ljubimcu (član 11.) ove Odluke,
- m) izvodi opasnog psa na javnu površinu bez brnjice i povodca (član 21.) ove Odluke,
- n) ne pokaže komunalnom redaru potrebnu dokumentaciju (član 22.) ove Odluke,
- o) ne drži pod kontrolom razmnožavanje kućnih ljubimaca (član 23.) ove Odluke,
- p) ne postupa sa izgubljenom životinjom (član 25.) ove Odluke,
- q) nalazač napuštene i izgubljene životinje ne postupi (član 26.) ove Odluke.

(3) Novčanom kaznom od 30,00 - 500,00 KM kaznit će se imalac kućnih ljubimaca ako pri izvođenu kućnih ljubimaca na javne površine postupa suprotno odredbama člana: 12., 13., 14. i 15 ove Odluke.

Član 30.

(Upoznavanje sa Odlukom)

Svi imaoi kućnih ljubimaca na području Općine Zavidovići bit će upoznati sa odredbama ove Odluke putem web-stranice Općine Zavidovići, putem mjesnih zajednica (oglasnih tabli, članova Savjeta i sekretara mjesnih zajednica) i putem predstavnika etažnih vlasnika u zgradama kolektivnog stanovanja.

Imaoi kućnih ljubimaca, dužni su njihovo držanje uskladiti sa odredbama ove Odluke u roku od jedne godine od dana stupanja na snagu ove Odluke.

Odredba člana 31. je dodata u Prijedlogu Odluke.

Član 31.

(Odredbe Odluke o komunalnom redu koje prestaju da važe)

Stupanjem na snagu ove Odluke prestaju da važe odredbe članova 174., 175., 176. i 178. Odluke o komunalnom redu („Službeni glasnik Općine Zavidovići“, broj: 3/2015 i 1/2017)

FINANSIJSKA I DRUGA SREDSTVA POTREBNA ZA SPROVOĐENJE ODLUKE

Za sprovođenje ove Odluke nije potrebno planirati finansijska sredstva u Budžetu općine Zavidovići.

PO OVLAŠTENJU OPĆINSKOG
NAČELNIKA broj: 02-05-4/17-AP-73
od 03.10.2017. godine
SEKRETAR OPĆINSKOG
ORGANA DRŽAVNE SLUŽBE

Nermin Čahtarević, dipl. pravnik

Obradila: _____
(Adisa Pašić)

Kontrolisao: _____
(Izet Bašić)